

## Adakah Hadiah dan Sumbangan Dibenarkan sebagai Tolakan Cukai?

**P**endapatan yang boleh dikenakan cukai bagi suatu tahun taksiran (TT) ditentukan mengikut peruntukan Seksyen 5, Akta Cukai Pendapatan (ACP) 1967. Pendapatan yang boleh dikenakan cukai perlu ditentukan mengikut turutan berikut, iaitu dengan menentukan peringkat bagi setiap pendapatan:

- (a) Pendapatan kasar;
- (b) Pendapatan larasan;
- (c) Pendapatan berkanun;
- (d) Pendapatan agregat dan jumlah pendapatan; dan
- (e) Pendapatan yang boleh dikenakan cukai.

Untuk menentukan jumlah pendapatan seorang individu yang bermastautin, hadiah dan/atau sumbangan yang diberikan oleh individu kepada kerajaan dan institusi atau organisasi yang diluluskan boleh dibenarkan sebagai potongan daripada pendapatan agregat. Potongan tertentu juga dibenarkan untuk ditolak daripada jumlah pendapatan dalam menentukan pendapatan yang boleh dikenakan cukai seorang individu itu.

Hadiah atau sumbangan yang boleh dituntut oleh individu adalah seperti yang diperuntukkan di bawah subseksyen 44(6) hingga 44(11D) ACP seperti yang berikut:

- (i) **Hadiah wang kepada Kerajaan, Kerajaan Negeri, pihak berkuasa tempatan atau institusi atau organisasi atau tabung yang diluluskan oleh Ketua Pengarah Hasil Dalam Negeri (KPHDN) – subseksyen 44(6) ACP**  
Amaun yang dibenarkan sebagai potongan adalah bersamaan dengan amaun hadiah wang yang dibuat kepada Kerajaan, Kerajaan Negeri atau pihak berkuasa tempatan dengan tiada sekatan. Hadiah wang kepada mana-mana institusi, organisasi atau tabung yang diluluskan oleh KPHDN juga dibenarkan sebagai potongan tetapi terhad kepada 10 peratus daripada pendapatan agregat seseorang individu. Berkuat kuasa mulai TT 2017, untuk tujuan kelulusan di bawah subseksyen 44(6) ACP, tabung bermaksud tabung yang ditubuhkan atau diselenggarakan oleh institusi atau organisasi di Malaysia hanya bertujuan menjalankan objektif penubuhan tabung tersebut dan tabung tersebut **tidak** ditubuhkan **terutamanya** dengan bermotifkan **keuntungan** – subseksyen 44(7) ACP.
- (ii) **Hadiah artifak, manuskrip atau lukisan kepada Kerajaan atau Kerajaan Negeri – subseksyen 44(6A) ACP**  
Amaun yang dibenarkan sebagai potongan adalah bersamaan dengan nilai hadiah seperti yang ditentukan oleh Jabatan Muzium Malaysia atau Arkib Negara.
- (iii) **Hadiah wang untuk menyediakan kemudahan perpustakaan yang boleh diakses oleh orang awam atau kepada perpustakaan awam dan perpustakaan sekolah dan institusi pendidikan tinggi – subseksyen 44(8) ACP**  
Amaun yang dibenarkan sebagai potongan adalah terhad kepada amaun maksimum berjumlah RM20,000 dengan syarat tuntutan bagi perbelanjaan yang sama tidak dibuat di bawah perenggan 34(6)(g) ACP dalam mengira pendapatan larasan daripada punca perniagaan.
- (iv) **Hadiah wang atau sumbangan dalam bentuk barangan bagi menyediakan kemudahan di tempat awam untuk manfaat orang kurang upaya – subseksyen 44(9) ACP**  
Amaun yang dibenarkan sebagai potongan adalah bersamaan dengan amaun hadiah wang atau sumbangan dalam bentuk barangan (nilainya seperti yang ditentukan oleh pihak berkuasa tempatan yang berkaitan).



**(v) Hadiah wang atau kos atau nilai hadiah peralatan perubatan kepada mana-mana kemudahan jagaan kesihatan yang diluluskan oleh Kementerian Kesihatan – subseksyen 44(10) ACP**

Amaun yang dibenarkan sebagai potongan adalah bersamaan dengan amaun hadiah wang atau kos atau nilai (sepertimana yang disahkan oleh Kementerian Kesihatan) apa-apa hadiah peralatan perubatan yang dihadkan kepada maksimum RM20,000.

**(vi) Hadiah lukisan kepada Balai Seni Lukis Negara atau mana-mana balai seni lukis negeri – subseksyen 44(11) ACP**

Amaun yang dibenarkan sebagai potongan adalah bersamaan dengan nilai hadiah lukisan sepertimana yang ditentukan oleh Balai Seni Lukis Negara atau balai seni lukis negeri berkenaan.

**(vii) Hadiah wang kepada mana-mana aktiviti sukan yang diluluskan oleh Menteri Kewangan – subseksyen 44(11B) ACP**

Amaun yang dibenarkan sebagai potongan adalah bersamaan dengan amaun hadiah wang yang dibuat kepada mana-mana aktiviti sukan yang diluluskan oleh Menteri Kewangan.

**(viii) Hadiah wang atau kos sumbangan dalam bentuk barangan kepada mana-mana projek berkepentingan negara yang diluluskan oleh Menteri Kewangan – subseksyen 44(11C) ACP**

Amaun yang dibenarkan sebagai potongan adalah bersamaan dengan amaun hadiah wang atau kos sumbangan dalam bentuk barangan dengan syarat amaun tersebut tidak melebihi perbezaan antara jumlah 10 peratus daripada pendapatan agregat dan jumlah amaun yang telah dipotong menurut proviso kepada subseksyen 44(6), 44(11B) dan 44(11D) ACP.

**(ix) Hadiah wang dalam bentuk wakaf atau endowmen – subseksyen 44(11D) ACP**

- (a) Mulai TT 2020, subseksyen 44(11D) ACP telah diperkenalkan untuk membenarkan suatu potongan berhubung dengan hadiah wang dalam bentuk wakaf kepada mana-mana pihak berkuasa agama yang sesuai yang ditubuhkan di bawah mana-mana undang-undang bertulis, badan yang ditubuhkan oleh pihak berkuasa agama yang sesuai tersebut atau universiti awam yang dibenarkan oleh pihak berkuasa agama yang sesuai tersebut untuk menerima wakaf; atau
- (b) endowmen kepada mana-mana universiti awam.

Potongan yang dibenarkan adalah tertakluk kepada syarat yang berikut:

- Wakaf atau endowmen yang dibuat adalah bagi tujuan mencapai objektif penubuhan pihak berkuasa agama yang sesuai, badan atau universiti awam;
- Pihak berkuasa agama yang sesuai, badan atau universiti awam tersebut hendaklah mendapat kelulusan daripada KPHDN bagi tujuan subseksyen 44(11D) ACP atas permohonan oleh pihak berkuasa agama yang sesuai, badan atau universiti awam tersebut; dan
- Amaun potongan hendaklah tidak melebihi perbezaan antara 10 peratus pendapatan agregat dan jumlah amaun yang dipotong menurut proviso kepada subseksyen 44(6), 44(11B) dan 44(11C) ACP.

Bagi maksud potongan di bawah subseksyen 44(11D) ACP, "universiti awam" bermaksud institusi pendidikan tinggi bertaraf Universiti yang ditubuhkan di bawah Akta Universiti dan Kolej Universiti 1971 [Akta 30] dan Universiti Teknologi MARA yang ditubuhkan di bawah Akta Universiti Teknologi MARA 1976 [Akta 173].

Maklumat lanjut berhubung hadiah atau sumbangan boleh dirujuk dalam Ketetapan Umum No.5/2021 - Pencukaian Individu Bermastautin Bahagian I – Hadiah atau Sumbangan dan Potongan yang Dibenarkan dengan melayari portal rasmi HASiL di [www.hasil.gov.my](http://www.hasil.gov.my).